

Undang kara air tawar asing mampu ancam ekosistem

17/11/2024 pg 9

Seremban: Jabatan Perikanan (DOF) sentiasa menjalankan kerjasama dan kempen kesedaran mengenai ancaman spesies asing yang mampu mengancam ekosistem sungai termasuk undang kara air tawar.

Pengarah Perikanan Negeri Sembilan, Kasim Tawe berkata, sepanjang tahun ini saja pihaknya sudah menjalankan beberapa siri program memburu ikan asing di negeri itu.

“Terbaharu kami mengadakan program Buru Ikan Asing dan Inventori Perikanan Darat pada 13 Oktober lalu di Sungai Mambau, di sini, bertujuan memburu spesies ikan asing.

“Sebelum itu kami sudah menjalankan beberapa program sama di seluruh negeri. Hasil daripada program ini kami menjalankan analisis dan setakat ini kami belum menjumpai spesies undang kara air tawar di perairan Negeri Sembilan,” katanya ketika ditemui.

Menurutnya, tahap kesedaran masyarakat mengenai pembiakan undang kara air tawar di perairan awam masih rendah tidak seperti kesedaran mengenai ikan bandar raya yang mana



Setakat ini kami belum menjumpai spesies undang kara air tawar di perairan Negeri Sembilan”

Kasim Tawe

orang ramai mula mem-buka mata.

“DOF melaksanakan program pendidikan dan kesedaran masyarakat mengenai pentingnya menjaga ekosistem perairan daripada segala jenis spesies undang yang memberi ancaman.

“Selain itu, kami juga meningkatkan penyelidikan mengenai impak undang kara air tawar terhadap ekosistem tempatan dan bagaimana menguruskan populasi mereka secara

mampuan.

“Malah, penguatkuasaan juga sentiasa dilaksanakan bagi memastikan tiada mana-mana individu yang melanggar undang - undang yang termaktub dalam Akta Perikanan 1985 yang berkaitan spesies asing ini,” katanya.

Beliau berkata, kerjasama dengan pihak penternak komersial juga sentiasa dijalankan dari masa ke semasa supaya pengusaha sentiasa mengikut garis panduan yang ditetapkan pihak berkuasa.

“Memandangkan undang ini mudah membiak, garis panduan ketat dan lengkap dikeluarkan supaya penternak komersial dapat mengikutinya dan pihak kami sentiasa memantaunya.

“Pengusaha ini juga mempunyai persatuan mereka sendiri. Pihak DOF sentiasa berhubung secara rapat dengan mereka dan memberikan bantuan termasuk nasihat,” katanya.

Harian Metro semalam melaporkan undang kara air tawar mempunyai rasa yang sedap dan harganya mencecah RM100 sekilogram namun spesies pendatang berkenaan berisiko mengancam spesies ikan tempatan.